

Lahir murid orang asli cemerlang

PIPOA beri peluang murid berpotensi ke menara gading

SHAH ALAM

Kepentingan anak-anak orang asli terutamanya dalam hal berkaitan pendidikan sentiasa dipertingkatkan dari masa ke semasa.

Pada 2012, Jabatan Kemajuan Orang Asli (JAKOA) telah menubuhkan sebuah pusat kecemerlangan murid yang dikenali sebagai Pusat Intellect Pelajar Orang Asli (PIPOA) di Rompin, Pahang.

Penubuhan PIPOA bertujuan untuk memberi peluang kepada murid orang asli yang berpotensi berjaya dalam bidang akademik dapat meneruskan pembelajaran hingga ke peringkat tertinggi.

Mereka dipilih berdasarkan keputusan Ujian Pencapaian Sekolah Rendah (UPSR) untuk dipersiapkan bagi menghadapi Peperiksaan PT-3 melalui beberapa siri program yang telah disusun rapi sepanjang berada di PIPOA.

Kemudahan asrama yang selesa dan makanan percuma mampu memberikan suasana berbeza kepada murid dalam usaha untuk menimba ilmu dan mencapai kecemerlangan dalam bidang akademik.

Pelbagai kemudahan lain turut disediakan untuk mencipta suasana pembelajaran yang kondusif, sekali gus mempengaruhi psi-

kologi murid untuk lebih fokus mengulangkaji pelajaran bagi menambah pemahaman apa yang dipelajari di sekolah.

Bagi melengkapkan lagi keperluan aktiviti ko-kurikulum, prasarana tambahan seperti dewan serbaguna dan gelanggang badminton turut disediakan.

Usaha ini telah menunjukkan hasil yang positif sejak awal penubuhan PIPOA sehingga kini. Kira-kira 50 peratus murid yang dididik di bawah PIPOA menunjukkan keputusan cemerlang dalam Peperiksaan PT-3 pada tahun 2014-2019.

Mereka ini ditawarkan memasuki sekolah berasrama penuh seperti Maktab Rendah Sains MARA (MRSM), Maktab Tentera DiRaja, Kolej Vokasional dan Kolej Permata Pintar.

Sementara bakinya meneruskan pelajaran untuk menduduki peperiksaan Sijil Pelajaran Malaysia (SPM) di sekolah menengah seluruh negara.

Lebih membanggakan, alumni PIPOA juga mencatatkan keputusan yang cemerlang dalam keputusan SPM dan

berjaya melanjutkan pelajaran di beberapa Institusi Pengajian Tinggi (IPT).

Menurut Ketua Pengarah JAKOA, Prof Dr Juli Edo, pihaknya merancang untuk menambah jumlah pusat seperti ini pada masa akan datang supaya lebih ramai murid orang asli diberi peluang yang sempurna dalam bidang akademik.

Katanya, pusat seumpama ini akan ditubuhkan di Kuala Terengganu yang akan dikenali sebagai Pusat Transformasi Modal Insan Orang Asli (PUTRA Asli) dan dijangka beroperasi bermula tahun 2021.

“Dengan adanya kemudahan dan prasarana lengkap seperti ini, saya berharap agar generasi baharu masyarakat orang asli dapat bersaing dengan masyarakat lain dalam bidang akademik.

“Ia dapat meningkatkan taraf hidup masyarakat orang asli melalui pendidikan dan mengeluarkan mereka daripada golongan B40, sekali gus meleeraikan sindrom kebergantungan masyarakat orang asli terhadap bantuan,” katanya di sini baru-baru ini.

Murid dipilih melalui kriteria berikut:


- Murid mestilah warganegara Malaysia
- Menepati takrifan di bawah Seksyen 3 di dalam Akta 134, Akta Orang Asli 1954 sebagai orang asli
- Lulus semua mata pelajaran dalam peperiksaan UPSR
- Keutamaan bagi golongan isi rumah B40
- Terlibat dalam kegiatan ko-kurikulum dan kurikulum di sekolah
- Tidak terlibat dalam sebarang kesalahan jenayah dan melakukan aktiviti yang tidak bermoral
- Wajib lulus pemeriksaan kesihatan
- Tiada rekod jenayah

Kemudahan lain yang disediakan PIPOA:

- Bantuan wang saku dan yuran persekolahan
- Pengangkutan murid pergi ke sekolah dan pulang ke kampung
- Program kecemerlangan dan modal insan
- Pemberian barang keperluan persekolahan, kebersihan diri dan alat tulis
- Penyediaan prasarana dan peralatan sukan



Suasana tempat murid yang kondusif, selesa dan bersih.



Gelanggang badminton turut disediakan untuk murid bersukan.



Antara murid orang asli yang akan meneruskan agenda pembangunan negara pada masa depan.

PIPOA dilengkapi dengan kemudahan asrama dan prasarana untuk aktiviti ko-kurikulum.

